

陳希豪編著

新疆史地及社會

正中書局印行

前言

新疆孤懸西陲，向爲荒徼之地，故古稱西域。漢唐以來，其地之治亂順逆，恒視國力之盛衰爲轉移，而歷代經營之方畧，亦復各異其趣。如漢代之致力軍事而傍及經濟，唐代之致力政治而忽畧經濟，元代則止于軍事，清代之改建行省，可謂集邊疆政治之大成，然而終忽于經濟與文化之建設。蓋皆以邊陲視新疆，烏能望其有進步也。

斯坦因嘗曰：「中國土耳其斯坦及其附近，東至中國本部，西至媯河流域，今雖大半荒廢，然就歷史記載，嘗發揮過重要之作用，許多世紀曾爲印度中國希臘之西亞三方文化交織所，足有一千年之久。」由此足見新疆自古卽爲中西交通之要地。有名之運絲古道，卽以疏勒爲吞吐之中心。故新疆在思想上文化上國際貿易上，均佔有重要之地位。

華萊士則稱之爲「中國之前門」，而此一前門，以晚近航海之發達，致易陸而海，漸被疏忽而遺忘，然而歐亞鐵路之貫通，國際空運之中心，新疆仍爲一極重要之樞紐。

左宗棠曾謂：「重新疆所以保蒙古，保蒙古所以衛京師。」誠以其東扞長城，南連西藏，北接蒙古，西依葱嶺，爲中國之前門，居舊大陸之中心，故得之足以維護中國，失之

則陝甘蒙古均失其險。而其幅員之大，約等四個四川，十五個浙江，而人口則僅四百萬左右，地曠人稀，其亟待開發建設充實，絕無疑義。

至其史地之沿革，宗族之分佈，宗教之信仰，風尚之因襲，民情之分析，文化之概況等等，向乏有系統之記載，迄未有一簡單明瞭之著作。故欲研究新疆之史地及其社會，無論在內地或來新者，均覺茫然。

總裁詔示：「建國基礎在西北」，則新疆之重要可知，然而新疆建省六十餘年，而國人真能瞭解其真相者，仍屬寥寥，甯非可惜！著者奉命于役新疆，于三十四年一月到達迪化，而欲尋求一卷，關於敘述本省之史地與社會之概況者，卒不可得。因于公餘草成是篇，以供世之關心新疆者之參考。唯匆匆問世，自嫌簡陋，幸讀者予以匡正。

本書若干材料之蒐集，得徐家驥先生之協助頗多，特此識謝。

三十四年十二月於中央訓練團新疆分團

目次

- 一 中國之前門
- 二 漢唐以來之變遷
- 三 在本國所佔之地位
- 四 歷代經畧西域之概況
- 五 新疆建省之經過
- 六 現有之邊境
- 七 宗族之分佈
- 八 宗教之信仰
- 九 風尚之因襲
- 十 民情之分析
- 十一 文化之概況
- 十二 潛在之力量

原书缺页 2-末

一 中國之前門

民國三十三年六月，美國副總統華萊士，奉羅斯福總統之命，訪問我國，取道新西北利亞之阿拉木圖，由我國之新疆入境，人或詢其入華之途徑，答曰：「余係由中國前門而入者！」語頗精警，含有極大之暗示力。誠然，新疆爲吾國五千年來之前門，由此門之出入，對於世界文化經濟曾發生過極大之對流作用。而新疆一地久爲中國、印度、希臘三方面文化之交織點。晚近五百年來，由于航路發現，海運暢通，于是南海，印度洋之航線，遂起而代替陸路之交通。從此堂堂大門，國人鮮有問津，漸由疏忽而冷淡而遺忘，馴至國防疏懈，門戶洞開。謀邊事者，應當如何認清過去，把握現實，開展將來，鞏固大門，使其負起金湯磐石使命乎？作者不揣簡陋，草擬「新疆之史地及其社會」一稿，以供國人之參考，而加以注意也。

二 漢唐以來之變遷

先儒梁啓超，根據法人伯克里氏所著「中國文明西源論」與日人白和次郎「國府種德

學說」，謂「我黃族之始祖，本自帕米爾高原，由黃帝之領導，迤邐東下。」上古史乘，雖屬荒逸難稽；證之近代名人考據，足以說明，新疆爲中華民族之發祥地。遠在紀元前二二八二年前，顧亭林「郡國利病書土地內屬」略云：「西域唐虞時率教見書禹貢所謂西戎卽序者是也，三代盛時，咸賓服貢其方物。」可見中國古代傳統政策，純以道德化人爲主，並不以武力征服相尙。顧實所作「穆天子傳」則謂：「周穆王曾取道新疆而至於歐洲大平原。」其中略稱：「登崑崙，復下崑崙而至于闐，升帕米爾大山，至興都庫什山，再折而北，東至喀什噶爾，循葉爾羌河至群玉山，再西踰帕米爾，經達爾瓦茲、撒馬爾干、布哈爾，然後至西王母之邦，卽波斯之第希蘭，又自今阿拉特逾第弗里斯之庫拉河，走高加索之達利厄耳峴道，北入歐洲大平原。」足見當時王化所被，與西方兄弟諸邦，常通問問也。春秋以還，海內紛爭，未遑西顧，遂致彼此脫節。秦代德薄，不足以言遠略，遂至匈奴役屬西域諸國，時爲邊患。漢武勃興，以張騫爲通使，三通西域，繼以兵力，解除西域弱小友邦急難；復遣公主下嫁烏孫，與之遙遙聯絡，於是大宛、康居、大月氏、大夏、烏弋山離、罽賓等三十六國，先後內附，威德所及，奄有新疆南部與尼泊爾及印度之北部。宣帝以後，匈奴內亂，呼韓邪單于郅支單于互相攻併，感漢威德，爭求和親內附。其後日遂王先

賢暉率衆來歸，帝使都尉鄒吉迎之兼護北道，設屯田之制，西域諸國，紛紛尙漢公主遣子入質，往來頻繁，互爲婚媾，於是漢室西域領土，包有現今俄屬哈薩克共和國之全部，西域各宗族之血統與漢人混爲一體。哀平以降，西域諸國復爲匈奴役屬，匈奴重斂相加，各不堪命，東漢光武建武中，遣使求內屬，願請恢復都護之制。光武以天下初定，未之允許。莎車王賢遣使奉獻請都護，車師前王鄯善焉耆等十八國，俱遣子入侍，願得都護，皆未之許。及至明帝北征匈奴，收復伊吾盧（卽伊吾），西通于闐，諸國稍稍內附。復由班超甘英之經營，舊時山南各地，得以次第光復。後又擊敗大月氏。至是西域邊界西越葱嶺，奄有今日之阿富汗。

曹魏雄據華北，襲炎漢之餘威，西域龜茲、疏勒、于闐、鄯善、車師前部、車師後部、烏孫、康居、大月氏等，均奉朝貢。晉代魏興，車師前部、鄯善、龜茲、焉耆諸國會遣子入侍，大宛、康居亦曾遣使貢馬。晉孝武帝，容納邊民內遷，雖曾釀成五胡亂華，然從此中華民族，形成劃時代之大混合。張駿據涼州，曾命其部將楊宣，西越流沙，討平鄯善、龜茲、西域悉降於涼。並於擒戊己校尉趙貞之地置高昌郡，是爲新疆設立郡縣之始。苻堅旋命呂光持節都護西討諸軍事，破焉耆、龜茲，得天竺沙門鳩摩羅什以歸，成爲東西文化

互通之大關鍵。拓拔魏太德中，龜茲、疏勒、烏孫、悅般、渴槃陀、鄯善、焉耆、車師、粟特諸國遣使獻貢，散騎侍郎董詭高明奉命招撫西域，與之俱來貢獻者十有六國。自後相繼，往來不絕。齊周峙立，西道阻絕，高昌郡立閼伯周爲王，是爲華人在新疆境內建國之始。嗣後張孟明馬儒麴嘉，相繼王其地。麴嘉並用漢胡文字，傳授毛詩、論語、孝經。隋煬帝命薛世雄爲玉門道行軍大將，西域諸國，相率入貢者三十餘國。計自漢代以還，新疆境內各小國，或爲領土，或爲屬國，常受翼庇之惠，均傾內向之念；列代帝王，亦以懷柔爲主，使各保存其固有文化，於是西方民族之受他族侵略壓迫者，皆紛紛以我新疆爲遁逃之藪。

隋末唐初，中原多故。東西突厥乘時勃興，稱霸西域。東突厥頡利可漢曾大舉內犯，陳兵渭橋，威脅長安。唐高祖用裴矩遠交進攻之策，賜西突厥統葉護可汗婚，與之聯盟以制東突厥。太宗奮其武烈，征突厥，平高昌，滅薛延陀，逐西突厥，悉定其地，奄有天山南北，及今日之俄屬烏茲別克、哈撒克兩共和國，以及撒馬爾干、浩罕之全部及阿富汗、印度之北部。西域範圍已超今日之新疆。

開元天寶以後，時與突厥、回鶻。吐蕃通婚，是爲西方各宗族與中華民族和合同化之

第二個時期。其後唐室中衰，西域領土大抵爲吐番所有。五代繼起，山北復淪于回鶻（卽維吾爾），山南則入于吐番。唐室之威靈于茲掃地。

有宋一代，偏安一隅，絕無遠志，天山南北悉入于遼。

元起朔漠，平滅西遼，悉有其地，更事擴充，則西域之疆圉已包括中亞西亞之全部。降至有明，兵威未振，西域疆土，皆非其有。山北遂化爲四衛拉特地，山南則爲巴什伯里、葉爾羌、吐魯番等國所分割。

清初北路則爲準噶爾部所據；南路則爲回部所領。經康熙、雍正、乾隆三朝之征討，天山南北得以復入版圖。兵威所至，遠近懾服，而哈薩克、布魯特、浩罕、巴達克山、帕米爾、阿富汗、尼泊爾均先後請求內附。西域之版圖，已過葱嶺以西，成就之大，不亞于元，實過漢唐。

咸同之間，用兵東南，未遑西顧，新疆復淪于回亂，俄人乘之，進佔伊犁，西域瓦解之象已成，卒賴左宗棠奮其垂暮之年，大軍西指，盡收失地，復由曾紀澤折衝俄廷，索回伊犁，全疆得以底定，然葱嶺以西各國終非我有矣。此後西陲邊鄙，復爲強鄰所蠶食，今日新疆已非左公時代之原狀，更不足以語盛清之疆圉矣。此漢唐以來變遷之大較也。

三 在本國所佔之地位

其地東扞長城，南連西藏，北接蒙古，西倚葱嶺，當中國之前門，居舊大陸之中心。得之足以維護中國之本部；失之則甘陝蒙古均喪其險。故曰：「重新疆所以保蒙古，保蒙古所以衛京師。西北臂指相連，形勢完整，自無隙可乘。若新疆不固，蒙古不安，匪特甘陝山西各邊，時虞侵略，防不勝防，卽直北關山亦無安眠之日」〔註一〕誠形勢之地也。往古邊鄙未通，不覺其重要。自漢通西域，二千年來不特吾族之安危，全仗西域之得失，而匈奴之強弱，亦以西域之通塞爲轉移。例如：武帝結烏孫，伐大宛，取三十六國，匈奴遂弱。鄭吉爲都護，治烏壘城，兼護北道，匈奴益衰。光武之世，未遑遠略，山南諸國，又入匈奴，因之國勢復強，共寇我河西。後經班超奮力經營，西道復通，匈奴由之斂跡。魏晉以還，國內未靜，鮮卑崛起山北，入據中原凡數百餘年。唐代復收西域，邊境始安，烽燧無驚。安史亂後，西域領土，北淪于回鶻，南入於吐蕃，凌夷至五季，邊患猖獗，從無寧日。宋代積弱，無力西顧，遂成偏安之局。元起漠北，奄有西域，卒平金遼，定鼎中原。清室勃興，三征西域，國勢日隆。由是可知歷代各朝不惜血殷天山，暴骨瀚海，孜孜以爭西

域者，豈非以其地位之重要，得失關乎整個興亡之國運歟？

近日情形與昔日更殊。西北與強鄰接壤凡數千里；西南與阿富汗英印毗鄰亦千餘里，國防之前綫在茲。是以新疆之一舉一動可以影響鄰邦，而鄰邦之一舉一動更足以影響新疆。滿州事件，殷鑑不遠，一誤不容再誤，則新疆在國防上軍事上之重要可知矣。

且也國防建設，端賴實業；實業建設，更重資源。新疆地大物博，蘊藏至富，建設之資源，實利賴之。僅以區區數縣之調查，已可發現三萬萬一千八百萬公噸之煤，一百三十萬公噸之鐵，六百萬公噸之銅，一萬公噸之鎢，二千公噸之鉬。（註二）以此類推，則全疆資源之富，可以想見。今後中國不言建設則已，如言建設，新疆必為最有希望之一省。總裁昭示「建國基礎在西北」，良有以也。

不特實業如此，農業亦然。新疆氣候高亢，雨量固少，但四山積雪，亘古未能盡融。雪水浸灌，成為伏流，四時涓涓，窮年不息，因成江河，積為湖沼，農田藉以灌溉，綠洲由之構成。若再加之人工經營，不難立得良田千萬頃。今就哈密、焉耆、和靖、和碩、吐魯番、托克遜六縣言之，無需動施工程，尙有耕地一千萬畝，任其荒蕪，無人利用，則全疆可知。（註三）至若北疆之伊犁河流域，南疆之塔里木河流域，土地肥美，氣候宜人，所

謂「綠樹村邊合，青山郭外斜」，塞上江南，更宜于農田，利于畜牧。戰前內地沿海都市，人口過剩，食糧不足，總理因有一萬萬移民西北之計劃，則新疆最低可容五六千萬。誠理想上之一大農區也。

且也新疆自古爲中西交通之要地，有名之「運輸古道」即以疏勒爲吞吐之中心。漢唐之際，海運未通，中亞文化之浸入，印度佛教之東來，以及中國文化之西傳，國際貿易之進出，無一不與新疆發生不解之緣。故斯坦因嘗曰：「中國土耳其斯坦及其附近，東至中國本部，西至錫河流域，今雖大半荒廢，然就歷史記載，嘗發揮過重要之作用。許多世紀（指漢唐）曾爲印度中國希臘之西亞三方文化交織所，足有一千年之久」。〔註四〕可見新疆在思想上，文化上，國際貿易上，均佔有重要之地位。

晚近交通發達，交通工具日新，未來之新疆豈特爲橫貫歐亞大陸鐵路之中心，最近將來，空運列車，網佈世界，以航空捷徑而論，新疆必更爲國際空運之中心。因交通中心之建立，開發新疆之富源，新疆之經濟文化必隨之而前進，則其在中國各省中佔更重要之地位必矣。

四 歷代經略西域之概況

歷代以還，因其地處邊鄙，遠隔絕漠，平沙無垠，交通梗阻，無天險可限戎馬之足，無舟楫可省轉運之煩，戰固困難，守亦不易。加之宗族複雜，強鄰虎視，文化水準低落，風俗語言隔閡，寬之則將狎而生玩，嚴之又易激成事變。故歷代之經略西域者，爲其所處地位之重要，用心至爲艱苦，不知絞盡多少腦汁，請申述之。

漢代之經營西域者，其對策在先致力於胡羌而收效于西域。故傾全力，北伐匈奴，西撻氏羌，使之與西域絕緣，打破其會師之迷夢。結果，遂在胡羌夾縫中奪得河西走廊，因之入西域之孔道通，而西域諸國亦內附焉。于是厲行兵屯民墾政策，以防胡羌，以保交通。乃于敦煌以東設隴西、金城、張掖、湟中四處之屯田，由是內地至敦煌之道安。于天山以南設伊吾、柳中之屯田，車師、渠犂、輪台之屯田，烏孫之屯田，由是南路之北道至疏勒之道安。于崑崙北麓又設樓蘭之屯田，由是南路之南道至疏勒之道安。其進行之步驟，全以軍事爲出發點，以農商相配合。蓋先以軍事奪得商道；然後寓兵于農，使兵屯於前，民墾于後，以促進糧食之生產。進又以兵護商。結果商旅安全，貿易發達。終則以

商養兵。于是歲歲前進，連城西移，既可就地徵糧，又可沿途籌餉，更可當地徵兵。復廣置驛亭，分佈斥堠，以利諜報。設都護一人，坐鎮輪台，校尉假司馬若干人于各屯地，如此統率屯兵，督察三十六國，治理西域，此漢代之情形也。

唐代國際情形與漢代稍異。北方匈奴之一部，其主力已由西北利亞繞中亞西亞，過烏拉山，遷入歐洲，氐羌二族則已退回青海西藏。當時所剩者僅殘餘之匈奴族。其居于金山者，則爲突厥回紇兩部，及殘餘氐族。在青海之吐谷渾與羌族，在西藏之吐番，然皆不似昔日之猖獗。尤其金山之突厥遭隋代之痛擊，實力更不充足。其時尙能稱雄于北方者，惟回鶻耳。然亦與唐帝國建立友好之關係，入貢稱臣而內附焉。可見當時並無若何勢力雄厚之強鄰。故太宗以方勝之兵，略事剿撫，西域之全境遂定。其時西域之領土，約等于西漢之三倍，故其政治之組織，亦比漢代更爲嚴密。設隴右道統轄南北兩疆以及葱嶺以西波斯以東之十六國。以大督護府爲道內最高之行政機關。置類似總督之大都護一人，直接對皇帝負責，爲道內之最高長官。復有副大都護一人，副都護一人，協助大都護辦理道內一切事宜。其下設長史、司馬、錄事參軍事、功曹參軍事、倉曹參軍事、戶曹參軍事、兵曹參軍事等各一人，分掌道內文書、兵馬、軍糧、戶籍、民刑等責。大都護府之下復設羈縻

州，統轄四都護府，專管西域。四都護府曰，安西都護府，初設于交河城（今吐魯番左右）後遷于龜茲（今庫車），統龜茲、焉耆、于闐、疏勒等四鎮，及月氏等府九十有六州（即今波斯以東，天山南路各地）；曰，北庭都護府，設于金滿城（孚遠縣），管庭州（迪化）、瀚海等軍三，沙隸等守捉十（即天山北路等地）；曰，崑陵都護府，統西突厥五咄部落；曰，濛池都護府，統西突厥五弩失軍部落，均在伊犁以西，中亞西亞等地。各都護府置都護刺史各一人，分掌府內軍民事件。所有各都護區內貢賦，版籍不上戶部，直屬于大都護。都護之下有州、有縣、有鎮；各城有使。戍邊之兵大者曰軍，小者曰守捉。其政治組織，井然有序，此唐代之情形也。

元代兵力至強，環西域者無對立之鄰邦。然其幅員太廣，統治不易，不得不分爲四個統治單位以掌理之。而西域則爲欽察汗國之領地。此後世祖統一中原，爲加強西域之內附力，乃改設行省一，元帥府三，均直轄于中央。行省曰阿姆河行省，統治葱嶺以西各地。元帥府曰，阿力麻里元帥府，轄天山北路各地；曰，別失八里元帥府，轄天山南路各地；曰，曲先元帥府，統吐魯番以東各地。並廣設驛站，以利交通，開拓墾殖，以裕民食。此元代之情形也。

清初三征西域，糜費不貲。爲鎮壓叛亂計，乾隆二十四年遂建總統伊犁等處將軍、參贊大臣、辦事大臣、同知總管等官鎮撫之。畫烏魯木齊以東爲迪化州，屬于甘肅省，以土著頭目掌理之。回部各城，設三品至六品回官分理民刑回務。復以伊犁、烏魯木齊、喀什爲三個軍事據點，分設滿兵駐防，漢兵屯田，皆携眷移戍。北路以伊犁爲中心，將軍駐焉，有兵一萬七千餘名。南路以喀什爲中心，領隊大臣駐焉，有兵一萬四千餘名。此清初之情形也。

茲後同治年間，中原正疲于洪楊事變，組織漸弛，邊亂遂起，全疆淪陷。俄人復乘機進佔伊犁，英人欲在喀什建國，朝議之士，又以東南初定，正宜休兵息民，主張放棄西域，封閉陽關以自守。幸有左宗棠老成謀國，大兵西指，解決迅速。于是痛定思痛，決議改建行省，定一勞永逸之大計。結果光緒八年伊犁收復，建省亦行。從此一掃二千年之舊制，爲西域劃一新時代，誠國家民族之大幸也。遂以「新疆」爲省名，代替以前之「西域」。

五 新疆建省之經過